



大清聖祖合天弘運文武睿哲恭儉寬裕孝敬
誠信中和功德大成仁皇帝聖訓卷之十七

武功五

康熙三十四年乙亥十月丙申

上諭議政大臣等曰傳諭沙木巴戴青墨爾根
濟農值雨雪時噶爾丹侵掠其疆界亦未可
定宜簡發其兵并附近喀爾喀台吉之兵於
諸處防守遠置塘哨探聽消息倘有噶爾丹
之警敵勢寡弱量力可擊則以其兵擊之若

敵勢衆多則設殿後之兵向歸化城內地移營雖退入內地亦不譴責也凡有動靜一面速報歸化城將軍一面奏聞

十一月庚辰

上諭內大臣等曰用兵之道以賞罰爲要今日大閱朕將降敕以昭示勸懲敕曰本朝用兵以來所向無敵野戰則勝攻城則克惟有弓矢劍戟爲用自三逆叛後南方皆水田賊人雖用火器相持而凡遇之敵靡不摧敗朕以

故洞悉特立火器製備鎗礮交發八旗由是
我朝之神威益震於四域矣今噶爾丹遊魂
假息於喀爾喀左近肆行竊掠朕欲一舉立
殄是以整理諸路糧餉器械熟計而行是師
之舉與昔不同茲爾將卒廝役各當勉力倘
遇敵奏凱而還朕必大沛殊恩陣亡者除照
常給賜身價外護軍則廕一子爲七品官食
俸驍騎則廕一子爲八品官食俸如無子則
照本身錢糧給其孀妻終老所借公庫官銀

另加寬卹倘違軍令勿得仍望如前矜宥

甲申

上諭西路督運光祿寺卿辛寶內閣侍讀學士
范承烈等曰輓輸朔漠車輛甚爲緊要爾等
其會同山西巡撫動支正項錢糧速行備造
勿致累民輓車兵卒給與行糧地方官有才
具者任爾等選擇帶往其管兵官員與輓車
人等亦必擇精壯者用之

十二月甲辰

上諭兵部師出以律可奏膚功自我

太祖

太宗

世祖以至於今野戰必勝攻城必克所向無前
雖士卒世受國恩捐軀報効實由我朝軍紀
森嚴信賞必罰兼以兵馬精強器械整齊之
所致也朕今次軍行特規酌舊制參以新謨
爰著爲令告我六師一大軍出征本都統護
軍統領副都統叅領等審視官兵甲冑弓矢

暨一切軍中器用務期堅利兵之盔尾甲背及戰矢之幹各記名其上馬烙以印鬃尾處繫小牌書旗分佐領姓氏以爲記號馬不烙印追銀二兩箭不書名追銀十兩給舉首之人一啓行時凡兵衆必各率行裝按旗隊以次前進不得零星散亂後先越走自出國門以至旋師當各遵守違者鞭責示警一在道毋離纛毋酗酒毋誼譁毋叫呼不遵者該管官卽行捕責一所過地方不得擾害居民及

蒙古部落如侵犯子女掠奪馬畜蹂躪田禾及擅離營伍入村莊山谷強取一物者兵丁廝役俱從重治罪其該管官及廝役之主一併議罪一邊境以內凡兵役在逃立刻緝拏依定例治罪出邊而逃該管大臣卽發官兵務窮追捕以正軍法設追緝不獲往追人從重治罪伊主并該管官一併嚴處一下營務按旗列幕不密不疎如越旗亂次前後攙雜者將該管大臣官員分別治罪其兵役內有

愍不畏法盜馬上零星諸物者懲以鞭責盜
馬匹及鞍轡者視盜賊多寡按律治罪一出
哨毋攜大燾各帶本旗顏色小旗遠距大營
設哨勤加巡視比暮則還就近地勿舉火勿
攜帳一人一騎其馬備鞍以待晝則近身牧
放夜則刈芻拴喂設寇至探明卽飛報大營
若無寇妄報與寇近不知以致傳報稽遲者
主將該汛坐哨官兵立刻正法軍前示衆一
值夜巡徼官兵必張弓束服袴鞬并解甲囊

以備不可怠忽無事人昏夜不得擅行行者
必問如衣服器械有異卽行擒拏苟貪睡偷
安或人數缺少該管大臣察出嚴治其罪一
與寇相近管兵將軍大臣酌派前鋒叅領率
兵往探務詳審賊情虛實地勢險易并嚴飭
營中夜無燃火一對敵列陣時主將必度地
據險寇或布野或結駱駝鹿角爲營我軍分
列行閒指明某隊某旗當擊敵陣某處戰時
鳴角進軍戰畢仍鳴角收兵官兵或棄其部

伍混入他人部伍或軼出本陣往附他人尾後或逡巡觀望逗遛不進照所犯輕重正法籍沒鞭責革職至我軍分陣進擊某旗對陣敵堅不動卽發所備援兵助擊之又對面臨陣時王貝勒貝子公大臣官員或不依次誼闖擁入或見敵寡不請擅進此一次功不議仍以罪論一敵陣動搖我軍攻入當嚴禁官兵不得掠人畜財物如不遵軍法貪行攫取者重懲不貸一敵敗北卽選兵馬追之隨派

隊伍接踵繼進倘追兵墮其伏中或遇寇遊兵我後兵與之接戰前隊兵仍行追進一師旋日當嚴行禁止凡軍器不得售賣存畱與諸蒙古違者從重治罪該管官一併議處一駝馬爲師行要需須擇水草善地牧放夜則加意巡防起營時畱官兵於後收察遺失駝馬審其印烙牌記各交原主其疲乏者卽於就近地方官或村莊居民或扎薩克蒙古處辨色登數交與飼養仍以其數報明兵部如

有將遺失駝馬隱匿乘用或因其疲乏委棄
宰殺者嚴治以罪令駝馬原主開明遺失疲
乏駝馬顏色數目亦報兵部登記一軍糈關
係綦重凡出征官兵須各計口按日支領攜
帶倘不如額查出卽從重治罪一有職掌大
臣官員原各有親隨兵卒不得復於大兵內
抽取以分兵勢如委署人員及官之原無親
隨兵卒者許各抽一名一大兵存駐處毋令
閒惰每日較射磨礪器械所頒軍令不時宣

諭令其詳悉夫兵者所以討逆安民朕不得已而用統兵大臣能體朕意嚴束屬下官兵於所過邊境內外不輕取一物使人民安堵如故奏凱日自行陞賞如縱官兵爲非擾害生事者定加重處凡茲軍令應通行曉諭各路官兵如傳示不到卽將傳示之人以軍法從事爾部其以朕諭與前南苑所降之旨一併刊頒俾各凜遵毋忽

是日

上諭議政大臣等曰凡綠旗兵卒內有從本陣前進超入駱駝營鹿角營衆人接踵齊進殺敗敵寇者第一名優陞千總其督戰之員優陞二級擢用至綠旗將弁內有親身超入駱駝營鹿角營敗敵者優陞三級擢用著以用印空劄頒發將軍提督總兵官凡綠旗官兵有顯著勞績者卽照所定職銜填注給與

康熙三十五年丙子正月甲戌

上欲親統大軍往征噶爾丹漢大學士九卿科

道等疏稱祈

皇上遣將授兵指示方畧停止

親征

上曰向年烏闌布通之役朕以策誘噶爾丹入
距京師僅七百里許大兵已經擊敗乃竟中
賊計致噶爾丹遁走彼時因朕躬違和未得
親至其地失此機會至今猶以爲憾噶爾丹
竄伏巴顏烏闌地方相距未甚遼遠以是不
憚勤勞親莅邊外相機行事此賊旣滅則中

外寧謐可無他虞假使及今不除日後設防
兵民益多擾累所奏已知之

乙亥振武將軍孫思克奏言臣同尚書
圖納公議派陝西綠旗兵九千於二月
初十日以內齊集甘州養馬一月一同
出邊但甘肅地方苦寒請候青草發萌
時出口再河西地方逼近蒙古應令提
督李林隆酌量帶兵駐扎甘州防守

上諭諸王大臣曰大將軍費揚古兵於二月二

十日前後進發將軍孫思克兵亦應令於二月二十日前後自寧夏起程甘州肅州等處兵若調至寧夏路途遙遠其到必遲見今寧夏有滿洲兵一千漢軍火器營兵五百應再增以西安滿洲兵一千漢軍火器營兵五百以足三千之數再寧夏榆林二總兵官標下綠旗兵共選派六千卽令該總兵官帶領同將軍博濟副都統阿南達等於二月二十日前後自寧夏起程令將軍孫思克將伊標兵

酌量選帶速來寧夏如及期而至則一同進發倘或不及可隨後踵進其滿洲漢軍兵丁馬匹未及喂肥著該將軍總督等將存畱滿洲漢軍并綠旗兵丁馬匹內酌選肥健者更換付之其添給綠旗兵丁馬匹并運米之駱駝馬騾俱令於各營及驛馬內選臚壯者給付一切事務令尚書圖納會同該總督巡撫提督等公商料理毋致有悞提督李林隆速往甘州駐扎酌量徵調官兵加意防守地方

速檄知之

二月甲午

上諭領侍衛內大臣等曰前令黑龍江寧古塔盛京立刻備兵各居其地者恐噶爾丹知我三路大兵進剿惶迫東行是以使之預備今視口外來報情形亦有東行之狀著薩布素立刻整備屬下兵馬遠設偵探如有用盛京寧古塔兵之處許彼星速往召總轄調遣其左近蒙古亦當小心防備因薩布素所居懸

隔恐報京聲息不得聞知可將凡屬噶爾丹之事口外報文一一查開月日發與薩布素知之以便准備行事盛京寧古塔將軍處亦著檄知

甲辰

上諭禮部兵部朕統御中外念切撫綏惟務休養民生未嘗遠事征討比年以來海宇昇平閭閻樂業四方固已無事獨厄魯特噶爾丹荒裔狡寇肆逞兇頑自烏闌布通敗遁之後

不自悔禍仍行狂逞悖天虐衆違茂誓言侵掠我臣服之喀爾喀潛入巴顏烏闌之地心懷叵測逆狀已彰乘其竄伏近邊自應及時撲剿倘目今不行翦滅恐致異日沿邊防戍益累兵民聲罪迅討事不容已用是遣發各路大兵分道竝進朕特躬蒞邊外相機行事以衆擊寡以正誅逆天意人謀無不允協此寇一殄則邊塵蕩滌疆圉輯寧內安外攘實在此舉告祭

天地

宗廟

社稷竝一切應行事宜著察例詳議具奏

甲寅

上諭議政大臣等曰朕親統六師前進法律須
極嚴明師行之日軍士俱先於郊次排列俟
朕啓行後仍復入城按日逐旗而出務必隊
伍嚴整夸蘭大叅領等各率本營行裝按隊
伍前進不得分散錯亂倘馬驚人墮致失馬

匹者令該夸蘭大章京及護軍校等親往尋
獲中路軍雖行尚俟西路消息倘值天雨卽
令駐扎其後隊不必等候傳示亦行屯駐凡
一應細事該營之皇子及諸王大臣夸蘭大
等公同結案事關重大再行請旨凡遇敵兵
令我軍攻擊朕必詳審可攻之處始令前進
必不以軍士軀命爲嘗試如臨陣遇敵不能
奮勇敗賊必治以罪前行之前鋒倘望見敵
兵必視有水草處駐扎以俟後隊軍至可通

行曉諭八旗

四月己丑員外郎席保住奏報侍衛克什圖主事保住奉使至噶爾丹所噶爾丹授之奏章令步行而回

上曰朕熟計噶爾丹情形久矣噶爾丹之心必以爲今當春令馬匹羸瘦此路旣無水草沙磧瀚海又甚難行大兵勢不能到至朕親來彼萬難料及故奪我使之馬駝令步行而回不過欲堅彼部下蒙古之心示以不懼耳非

欲使我兵遲延彼得遠遁也朕先傳諭大將軍費揚古與約師期今費揚古奏本月二十四日可至土喇若依期而至兩路夾攻則噶爾丹在我掌握安能復脫若我兵先到彼必連夜逃遁費揚古兵縱少遲緩必至土喇地方噶爾丹以疲敝乍到之兵費揚古迎擊可盡行殲滅觀彼在我使者之前舉動噶爾丹早已入我計中矣

戊戌

上諭撫遠大將軍費揚古曰朕所統軍將至汛
界時卽差護軍叅領車克楚前鋒侍衛祁薩
木往克魯倫左側躡探聲息今車克楚等還
奏云臣等初九日到伊扎爾地方見有寇踪
於是轉回初十日遇沙津王所差鄂齊爾等
言噶爾丹於本月初間自土喇向克魯倫移
營第三日我等歸噶爾丹在達爾漢敖拉山
以此揆之噶爾丹已近朕所統大軍矣此寇
乃極狡猾之人如敗遁斷不趨土喇必渡克

魯倫河或從俄儂巴爾濟赴塞稜格或繞巴顏烏闌之後設伏爾等兩隊兵見彼下克魯倫若隨踪而往未必不入其伏兵之中朕甚慮之特遣藍翎侍衛殷濟納等諭爾可詳詢地里及彼脫逃之路小心堵禦不可以彼向下流行而輕之特諭

己亥

上諭議政大臣等曰噶爾丹由克魯倫河順流已至伊渣爾厄爾幾納克地方我西來兩路

兵及中路兵俱近克魯倫河矣噶爾丹勢蹙或向東竄入亦未可知著盛京寧古塔兵前往索岳爾濟山屯扎黑龍江兵亦赴彼會齊可速檄行

五月己未

上賜敕諭噶爾丹曰朕統御萬邦惟以民命爲重不喜殺伐爾厄魯特喀爾喀向奉職貢爾等交惡構兵以來朕未嘗偏徇而於爾有異視喀爾喀爲爾所敗投朕乞命如朕不救之

則皆饑斃矣朕之濟人非特於喀爾喀如此也凡諸國窘迫來歸者朕亦一體救之已明諭爾數次爾奏章來索喀爾喀澤卜尊丹巴胡土克圖土謝圖汗言之不已朕始終不以喀爾喀爲直曾諭爾此事非懸議所能結當會盟以講之爾又以生計窘乏不能前來又以誓書所無之言屢向我使臣喇嘛支吾回奏阿喇尼巡行邊塞猝遇爾兵不待朕旨遂與爾戰因特遣王與皇子與爾會議爾屬下

人又先抗拒以致交兵其時所發他路之兵
朕急遣人止之勿與爾戰爾前年至巴顏烏
闌遂掠喀爾喀之納木扎爾陀音朕又特遣
使問故約與議盟今朕與爾若不覲面定議
不但爾國難存而我邊民亦不得寧居因爾
來旣近故秣馬繕備朕於三月初旬起行西
路兵於二月十八日起行黑龍江兵於四月
初六日起行盛京寧古塔兵於三月起行今
朕大軍已出汛界與爾逼近西路兵俱已到

土喇河東路兵俱已溯克魯倫河而來朕向
崇禮義順天理而行不恃勢力戕滅他人朕
果恃勢力則竟不遣使統各路之兵而勦滅
爾無所不可朕乃不忍生靈橫被鋒鏑是以
抒誠遣使朕與爾等覲面定議指示地界爾
照舊貢獻貿易則爾國安生而我邊民亦安
乃協朕保列國如赤子之意豈不休歟朕斷
不以計誘人切勿疑畏朕來欲與各處將帥
閱兵已傳令伊等勿戰非虛言也爾如不信

可畱朕所遣使臣內一人在爾地倘各處兵
進而攻爾爾可差所畱之人止之一面遣爾
前曾奉使爲朕所識之人來奏朕統御萬邦
豈肯誘人而破滅之爾或妄動而去則虛朕
美意而生靈有不利矣

癸亥

上以克魯倫河爲噶爾丹必爭之地乃分布隊
伍躬在前鋒前行於途次率數人登高
執圓鏡遠望見東有額爾德尼拖羅海

山西有山麓從巴爾代哈迤邐接河岸
上諭科爾沁土謝圖親王沙津達爾漢親王班
第喀爾喀車臣汗納木扎爾王西第什里貝
勒盆楚克貝子曰爾等各率爾屬下蒙古十
許人往據西方巴爾代哈山麓高處佯作全
軍從此經行之狀敵人來犯勿與之戰誘之
前來敵若有備則大兵爭先據河是日

駕抵克魯倫河

諭各隊領軍大臣曰噶爾丹若據克魯倫河我

兵奪河交戰猶稍費力今觀其不於此拒戰而竟逃竄是自開門戶以與我也除此地外他處斷不能拒我軍審其情形必連夜逃遁矣當輕騎急追之

乙丑

上遣大喇嘛垂喇克查木蘇格隆齋

敕往諭噶爾丹

敕曰朕惟治道原期有益羣生朕親統大兵欲與爾共議俾羣生享其利益故至此與爾相

近處兩次遣使其到否未知爾何竟無一次遣人來也朕爲天下大一統之主不肯罔人而行已經屢頒諭旨爾仍不信逃遁而去兵仗器皿盡皆拋棄爾所屬之人乞降而來者甚多爾生計迫蹙朕所甚悉爾前此無禮於朕使臣朕皆不介意將爾遺棄疾病之人與來歸之人盡皆收養朕若存嗜殺之心豈肯收養爾所屬之人爾仍不信遁去今西路大兵已至巴顏烏闌朕親統大兵至克魯倫河

黑龍江盛京寧古塔等處大兵皆會集於克魯倫河又斷爾歸路之大兵亦已至厄嫩巴爾查地方爾卽欲遁去安可得乎朕不忍生靈之塗炭故復遣使前來竝不欲將爾剿滅出自至誠爾試反覆思之若仍照舊職貢而來歸順可於丹濟拉丹津俄木布阿拉布坦三人中速遣一人來特諭

丁卯

上諭議政大臣等曰噶爾丹亡命奔逃量已至

巴顏烏闌矣若我全軍追趕似不能及應選
兵輕騎追逐除喀瓦爾達所領前鋒二百外
其餘前鋒盡行派出滿洲火器營兵及親隨
護軍亦盡派出著追至巴顏烏闌過巴顏烏
闌以北不必前往諸王等所屬之人若自有
二十日口糧不用官糧亦令同往其同回之
兵但畱其至拖陵所需五日之糧將餘糧著
各旗大臣親驗給與前進兵丁

辛未

上諭大將軍費揚古曰爾於十三日擊敗厄魯
特噶爾丹之事據厄魯特降人奔第來告朕
甚慰悅自五月初八日朕先士卒疾追五日
噶爾丹窘迫拋棄器械甲冑鍋釜帳房等物
及羸病幼小乘夜遁竄朕親率大兵追至拖
諾山再欲往追因爾各路兵會合不遠兩軍
旣會需米甚多恐至缺乏糧餉關係重大量
此窮寇以爾兵自西而來此處又發兵夾攻
卽可剿滅於是朕統大兵回迎糧米以內大

臣馬思喀爲大將軍授之大兵湊給二十日糧隨以帶來牛羊遣繼爾後又趲運爾路兵糧畱內大臣明珠於克勒河朔地方料理朕又給發馬駝充運糧之用交與明珠將見到米糧陸續運至爾軍運到汎界米糧甚多爾還師時由朕所行之路而來則米糧不致缺乏也

癸酉撫遠大將軍伯費揚古奏捷大學士伊桑阿張玉書恭捧諸王大臣文武

官員慶賀表入奏

上曰朕爲中外生民之主綏輯海宇愛養元元
惟以率土乂安爲念厄魯特噶爾丹擾亂邊
塞心懷狡謀逆天虐民不容不行勦滅朕親
統大軍遠出塞外聲討有罪噶爾丹聞風遁
走希圖倖脫適與西路大兵相遇大將軍費
揚古等奮勇力戰大敗賊衆擒斬無算盡獲
其人口牲畜從此邊境寧謐不煩遠事征討
四海蒼生可共享昇平之福朕心深切喜悅

丙子

上駐蹕席喇布里圖畱牧汎界蒙古王等行慶

賀禮

上諭曰爾等意中曾料朕此行可直抵克魯倫
立奏大功而還如是之速乎朕尊爲天子富
有四海此番出征朕日食一餐夙興夜寐櫛
風沐雨每至一處朕皆步行及聞噶爾丹確
信朕親率前鋒窮追凡此特欲速滅兇寇使
爾等咸得安生故耳今噶爾丹已滅不但爾

等永無侵擾之虞得享昇平之樂朕亦不復
爲爾憂勞矣

庚辰

上駐蹕塔爾奇喇賜畱牧蒙古諸王貝勒貝子
台吉等宴及白金喀爾喀妻子老幼齊

集

行宮東門叩謝再造之恩

上諭曰朕君臨天下統御萬邦本無分於內外
卽海隅荒陬皆吾赤子一體眷念厄魯特噶

爾丹逆天肆虐恃強凌弱擄掠喀爾喀等國
朕不辭勞瘁親統大兵征伐勦滅今厄魯特
之禍靖則朔方永清矣爾七旗喀爾喀自今
以後各自樂業圖報國恩以副朕家視天下
之至意

六月乙未

上諭大學士等曰此番出征地方形勢守亦可
戰亦可但得天時甚難兵早出則天寒無草
乏水兵不能行遲出則天暑雨水多倘連日

霽雨則樵採不敷必致窘乏此番兵出遇無
水之地而得水無草之地而草生寒暑俱調
此特

上天眷祐故滅寇而成大功竝非人力之所能
也其以是傳諭九卿

八月甲午

上賜敕諭策妄阿喇布坦曰朕統御寰區遐邇
一體仁育萬民皆欲使之共享安樂朕躬爲
一統之主懷保萬方獎善良懲兇逆未嘗或

爽先是爾陳奏噶爾丹之狡詐與侵害爾之
實情誠心懇請眷恤朕嘉爾恭順全受爾之
貢獻且以噶爾丹狂悖不靖闌入烏闌布通
爲朕偏師所敗跪誓於威靈佛前後又背誓
害我使臣掠喀爾喀阻止班禪胡土克圖之
來又至巴顏烏闌將爲禍亂其意顯露因發
三路大兵勦殺噶爾丹諸事降敕詳諭矣朕
親統中路大兵近逼噶爾丹卽欲率大兵勦
滅之又不忍衆生橫罹鋒鏑是以暫停撲勦

遣諭噶爾丹使來會盟定議喀爾喀之事爾
勿疑懼朕躬俟使臣覆奏遡克魯倫河而上
噶爾丹聞之心膽俱裂棄其子女廬帳釜鎗
什物遁去遇朕所遣堵截西路大將軍費揚
古兵於特勒爾濟之地噶爾丹卽來戰大兵
乃進擊之噶爾丹不得旋踵遂大敗斬噶爾
丹之妻阿奴及厄魯特二千餘人丹巴哈什
哈察罕西達里哈什哈等人二千餘俱降盡
獲其人口馬駝牛羊廬帳什物噶爾丹丹濟

拉丹津俄木布阿拉布坦等紛紛潰遁噶爾丹今已困窮矣爾向誠心肫篤請安進貢不絕於道與噶爾丹有不共戴天之讐噶爾丹窮兇極惡不可畱於人世一刻尚存卽爲生民之不利務必勦除以安厄魯特蒙古之生今或流行爾屬下厄魯特地方或奔往哈密地方如生擒噶爾丹則擒之來殺之則以其首來如此則爾向來恭順之心益著而朕眷顧之恩益無窮矣

九月辛酉

上諭戶部尚書馬齊兵部尚書凱音布等曰噶爾丹窘迫已極近朕差阿南達以巴圖爾額爾克濟農之兵堵禦其外恐噶爾丹乘虛往巴圖爾額爾克濟農行劫爾兩部檄總兵官王化行如噶爾丹往彼處卽率其兵往援并諭巴圖爾額爾克濟農知之

己巳撫遠大將軍伯費揚古遣郎中本什同卓力克圖押護丹濟拉所遣察哈

代等入奏

上賜敕諭費揚古曰丹濟拉雖云投降而噶爾丹之奏未至然彼雖不投降破敗已極如或來降大將軍可善言慰導令至歸化城其時相與籌度措置特易易耳今自丹濟拉以下凡所遣人至奏聞送至朕所噶爾丹若遣使來爾卽與言爾等若往奏而歸時愈寒冽必致凍斃爾可卽歸令噶爾丹來降其時我爲爾奏懇我主亦不拂我言也此等情事一面

奏聞一面更加周防其周防事宜馬匹最爲緊要朕在軍中見我軍之勇健無可訾議而於防護馬匹最覺踈虞萬一詐稱投降夤夜乘我不備驅馬以出所繫匪輕爾諳練行間事多閱歷聊以朕意念所及書以諭焉朕一聞噶爾丹信息卽以在京豫養之馬令軍士騎乘朕躬於九月十九日起程前往歸化城此際常須奏聞情勢爲佳朕心喜悅欲亟聞彼中實音爲此特諭

壬午

上諭內大臣蘇爾達等曰據厄魯特降人言噶爾丹往博羅烏納罕空津扎巴哈等處地方度冬令丹濟拉往就之所云博羅烏納罕者乃扎薩克圖汗舊居之地距汎界有四十餘日之程大將軍費揚古進兵之時右衛兵每人乘馬一匹以驢騾負裝其臙亦瘦料斷不能到噶爾丹所在之地必自翁金等處因馬瘦而還則徒勞無益朕所以使大同養馬者

正欲探實噶爾丹所在如立刻可行則於黑龍江六百兵內選前鋒二百新滿洲四百察哈爾兵一千全用肥健馬駝充足米糧進剿乘其窮困可一舉滅之噶爾丹業已盡破今我何故不深算剿滅之策而徒勞人馬乎今速檄大將軍費揚古不必進兵至來年青草萌時秣馬以待視噶爾丹所往剿而除之此際當頻遣厄魯特降人招撫爲要

十月甲申朔

上問喀爾喀多羅郡王塞稜阿海等喀爾喀厄魯特構兵之由

顧諸王大臣曰今日喀爾喀厄魯特皆在朕直論其事彼皆向來貢獻本朝之國兩國交惡其曲不在厄魯特而在喀爾喀喀爾喀先犯厄魯特喀爾喀理曲是以其國爲厄魯特所破但厄魯特假伐喀爾喀爲名進我境內烏闌布通之地爲我師所敗已誓不復侵喀爾喀矣今又背誓入犯我汛界屯於克魯倫之

地則厄魯特理曲是以朕親統六師滅之天道昭然毫髮不爽朕爲天下萬國之主寧有偏徇之理乎朕所以破厄魯特者非爲喀爾喀也喀爾喀王及厄魯特降人皆跪奏曰蒙皇上申明大義方知兩國致敗之由實我等所自取也

甲辰先是昭莫多之捷有厄魯特曼濟受傷被擒至是曼濟以其妻子在噶爾丹所求歸

上命遣之至大將軍費揚古處偕阿旺丹津齎
敕諭噶爾丹丹濟拉等

敕曰朕統御天下要以中外一體爲務往者烏
闐布通之役爾等雖經敗北朕尚欲與爾等
會約以定喀爾喀之事故使命屢頒爾等乃
違棄誓言搶掠納木扎爾陀音竟至克魯倫
地方朕親率師欲與爾會同定議遣使申諭
爾復狐疑不信不親見朕使及朕至克魯倫
爾遂望風奔潰遇朕西路之兵爾先犯我顏

行遂至喪兵敗衄盡棄駝馬牛羊子女廬帳
什物爾衆寨桑台吉等接踵來降丹濟拉格
壘沽英車陵奔等寨桑十五人亦願歸服遣
察罕哈什漢來陳奏悃誠朕已面諭遣還今
朕又親率六師遠莅於此且各處調兵邀截
爾等妻子馬畜諸物俱已散亡衣食已盡勢
迫無歸況時漸嚴寒朕不忍爾屬下厄魯特
妻子相失窮困凍饑而死特遣諭招撫今重
復降敕爾等若悔前愆俯首向化朕一體加

恩撫恤俾各得所爾部下厄魯特亦得妻子
完聚咸獲生全朕斷不念爾舊惡況爾部落
人內有被我軍所俘其父母妻子尚在爾處
不忍分離願歸故土者朕皆恩賚賜之坐騎
糗糧卽令遣歸使與其骨肉完聚其欲內附
不願歸者朕皆富貴之各得生養爾部人曼
濟重傷爲我軍所擒今曼濟言其妻子尚在
爾處因欲告歸朕是以給之恩賞賜以坐騎
糗糧使齎敕遣回爾地爾等思尚能永存有

能收養爾等之人否其熟籌之今已無所歸
爾等可速領餘衆抒誠歸順朕必令爾等家
富身榮各遂生養惜此厄魯特如許生靈被
爾驅迫至於此極今若又不覺悟聽信匪言
則後悔莫追矣爾其勿疑勿懼特諭

己酉

上命和碩扎薩克圖親王長史馬尼圖等齎
敕招撫厄魯特阿拉布坦丹津俄木布曰朕統
御天下撫恤黎元務使人人各得其所先是

爾厄魯特與喀爾喀互相讐怨朕欲爾等和好已頒敕諭喀爾喀厄魯特俱違朕諭自起戰爭喀爾喀旣敗來歸朕爲天下元后不忍坐視其滅亡於是納之注其名籍酌量封爲王貝勒貝子公扎薩克與以厚祿咸致富貴俾各得所噶爾丹乃不願朕拯救天下生靈借喀爾喀爲兵端闌入烏闌布通之地旣被我兵所敗雖詭誓遁逃朕猶數遣使頒諭令其會約以定喀爾喀之事噶爾丹違背誓言

掠納木扎爾陀音越克魯倫而前朕親統大
軍欲與會約特遣使往告噶爾丹狐疑不信
不與一見及朕親至克魯倫卽望風敗遁遇
朕西路官兵彼先逆戰遂至大敗子女牲畜
盡被俘獲丹巴哈什哈等先來抒誠後沙克
朱木等接踵歸附俱給以官職令其貴顯足
其衣食使之富有固已各得其所其來降之
衆內有子女被我兵所俘者皆行察出令其
父子兄弟夫婦完聚今朕又親統六師各路

皆已調兵阻截噶爾丹倘不來降必窮之於其所往爾阿拉布坦丹津俄木布前雖附噶爾丹然皆非倡亂之人今歸降之人皆云爾等與噶爾丹分析各居朕嘉爾猶知天道能自振拔憐爾之馬畜等物散失衣食已絕特遣和碩扎薩克圖親王之長史馬尼圖多羅郡王昆都倫博碩克圖之烏勒木濟多羅郡王墨爾根濟農之阿玉西又爾屬下之喇嘛羅卜藏班珠兒亦願招安爾等今同持諭前

往其扎薩克圖汗之子先經離散朕已收畱
覓爾岳母令與相會封爲親王食以厚祿頻
加撫恤頃又賜以牛羊馬羣擇地令其遊牧
使之得安生業享有富貴此顯然之明驗也
敕書一到著卽率爾部落來降前此依附噶
爾丹之咎朕概不介意必待爾以富貴顯榮
爾之部落亦使各得生業妻子完聚從容度
日丹巴哈什哈等朕尚憐恤使之富貴況爾
等乎若爾尚有疑懼今春策妄阿喇布坦之

使來時稱爾與策妄阿喇布坦甚善皇上若
滅噶爾丹請勿討阿拉布坦令其與我會合
等語且策妄阿喇布坦屢遣使納貢敬慎有
加故朕亦深加憐恤爾若同丹津俄木布往
附策妄阿喇布坦處朕亦不窮詰爾其向朕
使明白回奏倘於此二者不審一自處徼倖
於厄克阿拉爾空汗洛齊斯希等處棲身苟
免朕斷不姑容必會同策妄阿喇布坦根敦
戴青貝勒等剋期進討爾其早作良圖特諭

十一月乙丑

上諭議政大臣等曰視厄魯特人攜妻子來降則噶爾丹窮困已極但噶爾丹乃極狡之賊恐彼不得已來降乘我兵不戒竊奪零散喀爾喀財物逸去應著侍郎滿丕郎中桑格前往善巴王汎界地方駐扎不時差人出汎界外偵探如有聲息卽收喀爾喀入汎界內越大將軍營安插一面星速馳報前已有文檄知令滿丕等到彼後口傳旨諭大將軍費揚

古可也

丙寅撫遠大將軍伯費揚古奏請調太原滿兵署撫標下騎兵共一千及大同殺虎口未出征騎兵五百速赴軍前

上諭費揚古曰太原府兵未嫻行陣且至歸化城殆將千里其綠旗兵止各乘一騎值此嚴寒卽得到已不自支緩急用之必至悞事今撥火器護軍一千礮手二百四十前鋒二百六十共足爾所調一千五百之數爲爾豫備

目前馬甚肥衣亦厚此係隨朕親兵故極嫺熟朝聞信息晚即可行朕暫駐蹕於此俟噶爾丹實信今若來降卽星速遣至行在如有噶爾丹來降之信若不速撤汎界外喀爾喀信其降而坐待之則悞大事不淺矣近來丹濟拉差人請降而又來襲糧餉可爲明鑒今不得復悞當益詳慎遠慮可也

戊寅噶爾丹之使格壘沽英至

上命之近前

諭曰朕爲天下之元后萬國一家今日科爾沁
諸王貝勒台吉及喀爾喀厄魯特皆在此朕
當公言之喀爾喀厄魯特向皆職貢本朝之
國朕初無偏徇喀爾喀土謝圖汗執喀爾喀
扎薩克圖汗而殺之又殺爾主噶爾丹之弟
其曲實在喀爾喀後喀爾喀爲爾國所敗前
來歸朕朕憐彼十萬餘身命失其生路受而
養之凡有人窮迫來歸者朕皆收養無分彼
此不但喀爾喀卽爾厄魯特今爲敵國有來

降之人朕皆軫恤各使得生路量材授之官
職雖被俘擄之人皆贖還其妻子完彼骨肉
朕豈以喀爾喀厄魯特有異視乎前以噶爾
丹無故闌入我汛界侵內地蒙古朕遣兵敗
之於烏闌布通之地爾主噶爾丹窘極遁逃
立誓不復犯汛界朕向以至誠待人故不遣
兵窮追爾主噶爾丹逆天背誓離其故巢竊
伏克魯倫地方侵掠納木扎爾陀音朕不得
已統兵出塞然仍再三遣使約噶爾丹會盟

修好此朕不嗜殺人之心爾主不自引罪朕
始整兵進討噶爾丹不能抗我軍威日夜奔
逃適遇我西路豫堵之兵亦係噶爾丹先犯
我軍故我師乃進戰大敗之爾今窮困至此
極者皆爾等自取非朕欲陵之也爾旣奉使
而來第公言之毋隱格壘沾英初與諸大臣
言猶支吾巧辨及聞

皇上諭旨傾心悅服叩首奏曰誠天下之
聖主也

大清聖祖合天弘運文武睿哲恭儉寬裕孝敬
誠信中和功德大成仁皇帝聖訓卷之十七

大清聖祖合天弘運文武睿哲恭儉寬裕孝敬
誠信中和功德大成仁皇帝聖訓卷之十八

武功六

康熙三十六年丁丑二月丙戌山西道
御史周士皇疏言噶爾丹計日就戮請
御駕不必再臨沙漠

上諭大學士等曰覽周士皇條奏雖臣子之情
當然但周士皇未知其中之故耳噶爾丹兇
惡一日不可姑畱前在烏闌布通地方猖狂

肆逆朕已遣兵敗之猶不悔過復竊伏我克
魯倫地方朕親統大軍勦除畧盡今窮困已
極故乘此機會親臨塞外酌量調度前三逆
反叛吳三桂煽惑人心遂致滋蔓竟至榆林
等處朕日夜綢繆調遣大兵幾費心力方得
撲滅今蕩平年久人遂視爲易事且窮兵黷
武好大喜功朕所深戒朕亦曾作詩發明此
意著諭明周士皇伊所奏雖不當朕亦不罪
也

壬辰

上諭撫遠大將軍伯費揚古曰朕二月初六日
出行十一日至宣化府觀此際情形噶爾丹
窮困已極雖欲降何易得至此地寧夏地方
去噶爾丹所在薩克薩特呼里克之南格格
特哈朗古特地方甚近故遣叅領車克楚近
御侍衛僧圖等授以西安寧夏兵一百探視
至於伊克敖拉伊等報二月初三日已起程
矣爲此諭知朕意以爲將軍孫思克博濟等

率兵三千出嘉峪關或進哈密或進巴爾庫爾之路俟車克楚歸如可行則一路三千兵出寧夏進新勘之路如不可行則以兩路爲一路擇地而進殆可成功矣朕欲往寧夏視軍中糧餉及諸情形爾之意何如爲此諭爾商之主事保柱使於第巴報文併發爾知之

癸巳

上諭議政大臣等曰前旣陣斬噶爾丹之妻阿奴喀屯今又生擒其子賊之本根已斬噶爾

丹雖各處偷生其年老邁能延幾何其子爲
我所獲是乃天之所賜也凡用兵之道要在
乘機噶爾丹窮迫已極宜乘此際速行剿滅
斷不可緩朕今親臨寧夏相度機宜調遣軍
士賊聞之必魂魄俱喪其部屬亦必張皇而
別部蒙古聞朕親臨寧夏各欲見功扼噶爾
丹而圖之彼若不自盡亦必爲人擒獻克成
大事正在此舉矣又

諭曰朕親歷行閒塞外情形知之甚悉自古以

來所謂難以用兵者是也其地不毛閒或無
水至瀚海等砂磧地方運糧尤苦而雨水之
際樵爨頗難區畫不周豈可妄動朕今親臨
寧夏凡有可用兵之地必詳察行道水草全
備馬駝糧糗等物然後起程稍有可疑雖諸
臣勸行朕亦不允也

庚子

上諭撫遠大將軍伯費揚古曰朕於十七日抵
大同分析兵馬十九日由邊內起行赴寧夏

今噶爾丹如此窮蹙斷不至於用兵萬一有
噶爾丹前來聲息須星速報聞朕當從寧夏
進襲其後如噶爾丹屬下人來降或遣使來
當訊明速奏

三月丁巳

上諭議政大臣等曰朕至寧夏後方調甘肅兵
前行似乎稍遲此時噶爾丹窮極之際西安
滿兵二千甘肅綠旗兵一千俱久在甘肅馬
亦肥矣機會不可失宜速進薩克薩特呼里

克之地搜剿噶爾丹此滿漢兵各帶百日糧
嘉峪關至薩克薩特呼里克地方甚近不必
運糧如噶爾丹已遁此軍計糧而歸各賞銀
十兩此外另有當行當奏之事孫思克博濟
阿南達等公議具奏其哈密擒獻之俄摩克
圖哈什哈遣至伊等軍中倘有可行之機卽
行進剿如噶爾丹已遠遁則差俄摩克圖哈
什哈往諭之言我軍非來征討實來招撫爾
可速降至遣寧夏兵駐郭多里巴兒哈孫地

方備禦之事當檄將軍孫思克知之

壬戌

上諭議政大臣等曰凡調遣外藩兵馬之事俱已交大將軍費揚古如皆請旨而行則有倉卒軍機必致遲悞嗣後俱聽大將軍便宜調遣

癸酉振武將軍孫思克疏言奉

旨令臣等乘噶爾丹窮困之時帶百日糧速往薩克薩特呼里克一帶地方進剿但馬

匹未能齊備祈

敕兵部不論何項馬匹速解甘州
上諭曰機會不可失孫思克博濟等兵著卽取
伊附近綠旗兵之馬如可不悞卽令啓行一
面奏聞如不能得則扣糧減兵卽取所減兵
之馬馱糧而行自寧夏進剿之兵朕意不過
二千或二千五百伊等如謂減兵則寡而難
行著一處駐扎止令寧夏之兵進剿

閏三月辛卯

上諭議政大臣等曰朕曾以轉運糧餉及隨軍
安站之事與鄂爾多斯貝勒松阿喇布議之
彼奏言當此有青草之候以臣等帶來兵三
千足供運糧安站之用應將白塔以外運糧
安站事交松阿喇布同于成龍等商議而行
白塔以內運糧安站事交總督吳赫管理其
西安副都統阿蘭台兵三百亦交與于成龍
又馬思喀帶來之兵若祇自齎口糧一月則
其餘三月之糧及隨軍所運之糧爲數甚多

船運一次未必能完勢必再運一次大兵豈能空坐久待應令馬思喀兵各齎兩月口糧外所餘之米船裝以運船裝不盡者令大小官員均派帶往若復有餘令于成龍竭力運至白塔隨軍遞運之米應至何處應止何地著大將軍費揚古議政大臣與于成龍等會同詳議具奏

壬辰

上諭內大臣等曰大兵起行之前當遣人招撫

噶爾丹丹濟拉此差不必遣本朝之人前與
塞卜騰巴兒珠爾同擒者有噶爾丹乳母之
子丹濟扎卜再撥願往之厄魯特人齎敕而
往一面遣使一面進兵達賴喇嘛身故已十
有六年矣第巴指達賴喇嘛之語以誑噶爾
丹彼信其誑自言爲達賴喇嘛之教而恣肆
橫行以此等事明開敕內照樣刊刻多印付
丹濟扎卜等通行傳示併遣使諭策妄阿喇
布坦令乘此機會亦興兵剿滅之

敕諭噶爾丹曰去冬命爾早降則予以富貴給以資產眷顧煦育之卽爾所屬厄魯特之衆亦各得見其妻子遂其生業故遣使偕格壘沽英往宣敕旨今使者喇木扎卜至覽爾所奏謂未明朕旨觀爾辭意一無真實而請給還來奔之厄魯特豈惟厄魯特之衆雖爾子塞卜騰巴兒珠爾及爾乳母俱已被獲今皆恩養與徽特和碩齊同居爾若來歸卽令爾子與爾相聚否則爾有何功遂還爾厄魯特

之衆爾欲歸降應及早來若不歸順徒遷延
時日何益況達賴喇嘛已故朕亦知之曾嚴
敕第巴第巴又遣尼麻唐胡土克圖上表來
賀捷且奏稱達賴喇嘛已沒十六年其再生
後身年已十五歲則爾之指稱達賴喇嘛以
爲護法欺誑衆人者已顯露矣爾所逃匿之
地厄魯特來降者多朕已悉知即使遁入洪
郭羅險固之地諸路皆可進剿爾困迫若此
尚何力拒守卽今已無歸所矣今歲卽不擒

汝來歲當卽發兵追討必不中輟汝其詳審之

敕諭丹濟拉曰朕爲天下元后善善惡惡乃至理也去歲遣格壘沽英等歸敕內開載爾名復使格壘沽英傳諭今格壘沽英等來爾之辭意皆已備陳爾今能致噶爾丹來降必當封爲貝勒畀以殊榮如不能致爾一身歸順亦能不失富貴況爾以下之人先降者皆釋其罪顯榮優養爾當悉聞已往之過槩不介

意爾曾密奏若宥臣罪臣請投降故特專賜
敕旨盡宥前罪敕到其速降朕爲大君豈改
成命特諭

敕諭厄魯特之台吉寨桑哈什哈并其衆人曰
朕無分中外皆欲其各安生理樂育昇平至
於誅戮征伐原非本懷爾厄魯特等附從噶
爾丹所在侵掠雖有所得於人而已之祖父
戰死妻孥被掠者亦云衆矣今所餘之人不
被創受傷者甚鮮死亡之餘其存幾何因從

噶爾丹之故以至窮迫無歸困苦已極屢頒諭旨命噶爾丹前來歸順則凡爾厄魯特之衆朕必俱加養育使之各得其所乃噶爾丹怙惡不悛並不以爾衆爲念不思歸順他日兵臨則爾衆難免俘戮故特諭厄魯特之衆爾若能各攜族屬妻子來降者朕皆養育使得其所前所降者已加參養爾衆亦當聞之矣特諭

命工部侍郎常綬等齎

敕諭策妄阿喇布坦曰爾歷來請安納貢克恭
克順朕亦加眷顧恩施頻及噶爾丹奸詭性
成雖彼至戚靡不嫉害卽將厄魯特之四部
喀爾喀之七旗致令破亡分裂又以追襲澤
卜尊丹巴土謝圖汗等爲名侵我邊境屢擾
不已朕因於去歲數道遣兵親行征剿直抵
克魯倫土喇地方大破噶爾丹陣斬甚衆其
妻亦被誅戮冬閒復遣兵西出哈密地方獲
其子塞卜騰巴兒珠爾等今窮迫已極所屬

大小寨桑哈什哈等相繼來降者不絕其餘
附從之人及寨桑等流離逃散俱欲投順密
報前來今噶爾丹僅餘子身率領數人隨處
飄遁爾當亦聞之矣爾前奏稱噶爾丹若近
逼我土必竭力擒剿又言隨聖上指示効力
盡瘁等語噶爾丹兇惡已極有如魑魅斷不
可畱今數道遣發大兵搜討夫噶爾丹與爾
素有深仇乘其困迫應起兵復仇進剿且達
賴喇嘛久故第巴詐飾其尚在之狀故嚴敕

第巴而第巴大懼遣尼麻唐胡土克圖來言
達賴喇嘛亡故已十六年其再生後身已十
五歲據實陳奏則噶爾丹所稱護達賴喇嘛
之法者其爲欺誑衆人也明矣欲爾明悉故
遣工部侍郎常綬內閣侍讀學士伊道侍衛
克什圖等齎敕諭爾特諭

四月庚戌朔

上諭議政大臣等曰此地至兩狼山一百二十
里無水應於于成龍等未到之先集軍中駱

駝送米過此無水之地令內大臣明珠都統
噶爾馬王永譽押去到後著噶爾馬王永譽
畱彼守米著明珠帶回駱駝舊歲中路進兵
各驛備米供給兵廝商販故人不致飢此次
進兵所關甚要凡事不得不周詳籌畫朕已
遣往寧夏取米五百石俟到後畱貯於此
隨運兵丁亦酌量畱之著一大臣駐此管轄
將此米從驛站陸續緩運每驛量畱米俟回
師之兵廝商販乏糧者給之上駟院趕來馬

一千四百餘匹亦畱於此擇水草善地牧放
肥壯俟回師之兵有乏馬者給之鄂克濟哈
仍駐寧夏凡馳報之事由新設邊外驛站遞
送則路近而無悞總督吳赫船站照常安設
船站以外令設蒙古驛站馳報軍機

甲寅

上諭議政大臣等曰今諸事俱畢惟噶爾丹僅
存各處逃竄大兵前進搜剿不久旋師路必
由此當逐站置米師回乏糧者以米給之來

降之厄魯特青海來朝之台吉等俱由此來
米糧馬匹已畱於此則駐此而理事者尤爲
緊要朕本欲駐此親理其事但天下事大是
以回鑾著畱領侍衛內大臣索額圖并都統
阿錫坦噶爾馬王永譽護軍統領蘇赫副都
統巴賽等於此

甲戌厄魯特降人諾爾布寨桑等以勦
滅噶爾丹奏請行慶賀禮

上諭曰往者噶爾丹以追逐喀爾喀爲名直入

我扎薩克烏闌布通地方故朕命裕親王及
皇長子率師往剿之噶爾丹大敗使濟隆胡
土克圖往復陳說自今以往不敢再犯邊陲
噶爾丹頭頂威靈佛以誓此爾衆所共聞者
也嗣後無故過土喇潛處巴顏烏闌地方掠
我臣服之納木扎爾陀音故朕親率六師聲
罪致討然猶不忍遂加誅滅再四遣使諭以
和好而噶爾丹怙惡朕故整師進剿噶爾丹
不能當我軍威驚潰奔逃遇我西路大兵奮

擊大敗之此皆噶爾丹違天背盟以致禍患及身國隨以亡朕但思掃除殘暴拯救羣生誠惻懇懇求符天理故大軍所向無水之方靈泉觴沸不毛之地瑞草蕃滋山川效靈百神顯佑聞噶爾丹所至之處必有烈風暴雨災異頻逢驚聞我軍之來寢食俱廢反復思維無計能逃窮急仰藥而亡由此觀之天可違乎其助順惡逆亦顯然矣夫與朕爲敵者惟噶爾丹而已與衆何涉不惟噶爾丹在日

爾等降者必加恩撫恤卽今噶爾丹已死凡有降者朕亦如爾輩恩育豈忍異視耶然噶爾丹之滅朕之大小官員當奏請慶賀爾輩素皆受恩於噶爾丹之人不當奏請

五月丙申

上諭大學士九卿等曰塞外情形不可臆度必身歷其境乃有確見昔朕欲親征噶爾丹衆皆不欲惟費揚古與朕欲討之後兩次出師衆愈不欲若非朕親統大軍追襲噶爾丹使

之少畱餘息彼必復聚難以遽滅矣明時爲
恢復河套議論紛紜致大臣夏言曾銑受戮
自朕觀之此地無甚關係若控馭蒙古有道
則河套雖爲所據安能爲患控馭無道則何
地不可爲亂蒙古游行之地防之不可勝防
專言收復河套亦何益乎至行師之道調軍
轉餉必一人兼綜其成事乃易濟前西路進
兵時將軍博濟孫思克等專管軍務不與輓
運專責地方巡撫等官轉餉迨後糧餉稽遲

兵丁困餒致有道殣頃朕自白塔至船站猶見有遺骸皆遣鄉導沿途掩埋朕統大兵由中路進時多方籌畫催督運餉比及旋師無一人受餒且支給西路之兵俱獲全還又令沿途各站多貯米糧雖隨營貿易之人皆不之食此役寧夏之行料理糧餉悉有次第然後進兵所以直至回軍供應皆足無或稍悞以此觀之兵食兩事斷宜一手區畫此後倘遇行師當永以爲法朕又觀塞外運糧最難

昔唐宋及明嘉靖時皆用兵西陲不知當日作何轉運之法朕此次寧夏之行不用車輛所需駝馬騾驢悉自京城發往恐有不敷復給公帑採買預備一切什物皆由官運畧不累民

癸卯禮部題請平定噶爾丹武功告成典禮

上諭曰喀爾喀厄魯特原皆納貢之國因其交相不睦屢諭和好乃仍構釁致起兵爭噶爾

丹曾破回子中之薩馬爾漢布哈爾哈薩克
布魯特葉爾勤哈思哈爾賽拉木吐魯番哈
密諸國其所攻取降服者一千二百餘城乃
習於戰鬪之國也喀爾喀焉能抵敵是以七
旗數十萬衆一歲之中喪亡畧盡喀爾喀之
汗諾顏台吉等知朕叅養蒙古夙有厚恩悉
皆款塞來歸其時若不允其內附恩養得所
必皆淪入於厄魯特則爾時噶爾丹之勢力
不言可知矣允其內附而恩養之噶爾丹必

假此釁端與我朝構難凡此情事皆經熟籌
受納喀爾喀非漫然而爲之也噶爾丹假索
取喀爾喀爲名遂犯我汛界尚書阿喇尼率
蒙古兵逆戰於烏爾會之地我師大北噶爾
丹乘勢遂直抵烏闌布通距京師未及七百
里斯時諸大臣及國家諳悉軍務之人不在
行閒者少矣適朕躬以違和還京左翼軍雖
能勝敵而右翼軍不能制勝大臣而下以至
軍士陣亡被創者甚衆噶爾丹亦自知其無

濟歸路遭罹瘟疫得還科卜多者不過數千人耳當是時卽豫知其勢雖大損必復稱兵犯境六年以來烏闌布通之役時厯朕懷因是訓練軍旅諮訪形勢正經理武備之時噶爾丹果復舉兵寇掠喀爾喀之納木扎爾陀音於克魯倫之地朕思此賊不可以尋常寇盜視之詔武臣三品以上咸陳滅賊方畧會同詳議舉朝皆以爲難其言賊當討滅者不過四人朕以爲此賊斷當亟圖遂宣昭大義

祭告於

天地

宗廟

社稷之靈克成厥勲倘事或未成則受喀爾喀
之內附致厄魯特之兵爭糜中國之脂膏事
朔荒之邊塞窮兵黷武其名恐未能免矣今
我師所至

上天佑助無水之地而靈泉湧出不毛之土而
庶草蕃蕪事悉稱意者此皆國家之福將士

之勞所致也今西北永遠寧謐其不致蒙咎者卽幸矣自今以往務益殫勵精始終如一治安之日愈求治安其祭告諸典禮俱依議行徽號不必上

六月甲戌

上諭大學士等曰四川總兵官馬子雲欲率回子襲噶爾丹之後回子生性無義曾三擒其主以獻噶爾丹其兵豈可用乎本朝之兵所向無敵若有事時已不可勝用矣安用外國

之兵古來用外國兵鮮有善者宋用金兵滅遼復用元兵滅金金旣滅元遂滅宋此其明驗也初噶爾丹并吞吐魯番葉爾勤薩馬爾漢哈薩克等千餘部落本朝並不之問當厄魯特與喀爾喀戰時本朝若助厄魯特今如何能破噶爾丹乎噶爾丹旣克喀爾喀直侵內地朕始領兵勦滅前定海總兵官藍理曾請率所屬籐牌兵進勦沙漠地寒冰凍與南方迴別籐牌兵雖強夏尚可用自八月以至

三月豈但交戰卽籐牌亦不能執此皆人地不相宜所謂紙上談兵者也馬子雲粗鄙不識大義可曉示之

七月丁酉

上御太和殿王以下文武各官以平定朔漠并
太和殿告成上表行慶賀禮

詔諭天下曰朕君臨天下早夜孳孳勤求治理惟恐一夫不獲其所初未嘗有岐視中外輕事兵戎遠伐異域之事厄魯特噶爾丹向與

七旗喀爾喀同奉職貢嗣因兩國交鄰構兵
喀爾喀汗等爲所敗衄叩關內附噶爾丹乃
借辭追擊闌入我邊境恣行狂逞朕屢頒敕
諭令其悔悟自新而狡寇不知省悟益肆鴟
張其逆謀不測實有偏處近塞窺伺內地之
漸朕思此寇包藏禍心倘不卽行撲滅則異
日必緣邊設防重滋民困何如及時聲討立
靖根株於是昭告

天地

宗廟

社稷躬統禁旅不憚勤勞三出塞外去年夏賊於克魯倫地方自度力不能抗倉皇宵遁朕親追至土喇河適西路大兵遮截其後擊敗之於昭莫多賊勢大挫冬月復駐蹕鄂爾多斯收撫其降衆遏絕其外援而賊益困蹙機會所在刻不可失遂以今年春西巡邊境從寧夏出塞遣發大兵兩路進剿而青海烏思藏人等皆先後輸忱自効哈密國人又俘獻

噶爾丹之子於行在噶爾丹窮迫已極一聞
大軍壓境計無復之隨於阿察阿穆塔台地
方飲藥自盡揆之料敵成謀適相符合自此
寇氛盡滌邊圉永安而朕爲民除害不得已
而用兵之意亦可曉然共喻於天下臣民矣
武功告成之會正太和殿鼎建工竣巍煥方
新臨御伊始協氣集於九重觀瞻肅於萬國
是用覃敷慶澤以上答

郊

廟

社稷之靈下協中外人心之望懋武功而敷文
德聿臻熙皞之風建宸極而鞏皇圖永慶平
成之治誕告中外咸使聞知

十月乙卯理藩院題厄魯特丹津俄木
布使彭楚克車陳白克阿兒達爾俄木
布來言丹津俄木布與策妄阿喇布坦
不合今已無所歸矣應遣人招之使來
上遣羅卜臧丹巴齎

敕前往

敕曰朕前聞爾與噶爾丹分析游行故差黑色馬尼圖捧敕諭以來降必使富貴優加恩養爾如同阿喇布坦往歸策妄阿喇布坦朕亦不究著明白覆奏如兩無所歸欲於額黑阿喇兒洪郭羅等處據險竄伏朕斷不容必刻期破之爾使人諾顏格隆臧布額爾克俄木布阿旺達什等來奏云倘噶爾丹至我近地必擒而殺之歸降聖朝又以敕書使諾顏格

隆臧布齎去諭爾雖不能擒殺噶爾丹而身
率屬下來降亦必使之富貴而優養之毋疑
毋阻今爾竟不往歸策妄阿喇布坦仍另自
游行豈因爾向與策妄阿喇布坦不睦有歸
噶爾丹之事故不便復歸策妄阿喇布坦乎
今噶爾丹身死國亡生擒其子塞卜騰巴兒
珠爾又擒伊拉古克三胡土克圖今爾不速
來漸至日久則爾生計亦漸迫若爾率屬下
星速來降朕必加以厚恩優待愛養日下丹

濟拉車陵等來降俱使得所而愛養之爾亦當聞之詳矣今軫念爾無所歸生計窘迫欲使得所之意爾當籌之速來歸降毋貽後悔爲此特遣爾幼時服役識認之人羅卜臧丹巴齋敕往諭

十二月甲寅

上諭大學士等曰朕屢次出兵看來爲將誠難一應軍務惟在相機而行固不可急亦不可緩如阿喇尼紀爾他布過於急而爲賊所敗

馬思喀等又過於緩而致伊拉古克三胡土
大克圖逃脫去年中路出兵時雖以衆論俟大
將軍費揚古然以此爲至論亦屬不可彼時
費揚古於五月十三日若不到昭莫多則噶
爾丹豈不脫逃乎故爲將者必相機調遣方
能濟事其餘庸流則多有失策矣

大清聖祖合天弘運文武睿哲恭儉寬裕孝敬
誠信中和功德大成仁皇帝聖訓卷之十八



